

Mi sò pisatu di u tavulinu, M'hè toccu à parte da mare in da
Ellu, ùn parlava, mi era vicinu, Ella hà circatu un pane à dà
Ùn bastera solu una penna, Pè scrive li centu canzone
È ringrazià li ghjustu appena, Di tantu amore è affezione

Ripigliu...

È sò i mei nantu à a terra, Chì si ne vanu pè u caminu
Chitanu l'ortu, si cala a sera, Vanu arritti, ghjè u so destinu

Da u mulinu sinu à lu fornu, Ùn sò chè quesse e so lotte
Cumbattenu tuttu lu ghjornu, È dormenu un pocu a notte
Ùn sanu micca a grande storia, Ma a soia a sanu tramandà
Anu in fondu di a memoria, Tutti l'eredi di l'al di là

Ripigliu...

Discreti ùn si sente un fiatu, Passanu pocu ind'è u giornale
Solu una volta pè u so natu, È pè u viaghju universale

In lu so sguardu chì si tace, Si spechja tutta a mo pena
Aspetteranu l'ora in pace, Di u mo ritornu à a so cena

Ripigliu...

A notte fala in Erbaghjolu, Eiu mi ne vò pè a cità
Scorre digià u renaghjolu, Infine possu pienghje avà

Vi vulia dì in isse duie rime, Ciò ch'ùn palesa u vostru core
Ma vulteraghju à lu vaghjime, L'annu chì vene, si Diu vole.